

BOSNA I HERCEGOVINA
CENTRALNA IZBORNA KOMISIJA
SREDIŠNJE IZBORNO POVJERENSTVO



БОСНА И ХЕРЦЕГОВИНА
ЦЕНТРАЛНА ИЗБОРНА КОМИСИЈА

PRAVILNIK
o formi, sadržaju, upotrebi i izradi izvoda iz Centralnog biračkog spiska

Sarajevo, maj 2026. godine

Na osnovu člana 2.9. stav (1) tačka 2, a u skladu s članom 3.18 Izbornog zakona Bosne i Hercegovine ("Službeni glasnik BiH", br. 23/01, 7/02, 9/02, 20/02, 25/02, 4/04, 20/04, 25/05, 52/05, 65/05, 77/05, 11/06, 24/06, 32/07, 33/08, 37/08, 32/10, 18/13, 7/14, 31/16, 41/20, 38/22, 51/22, 67/22 i 24/24), Centralna izborna komisija Bosne i Hercegovine je na 29. sjednici, održanoj 06.05.2026. godine, donijela

P R A V I L N I K
o formi, sadržaju, upotrebi i izradi izvoda iz Centralnog biračkog spiska

POGLAVLJE I. UVODNE NAPOMENE

Član 1.
(Predmet)

Pravilnikom o formi, sadržaju, upotrebi i izradi izvoda iz Centralnog biračkog spiska (u daljem tekstu: Pravilnik) se utvrđuju:

- a) rokovi i način za zaključivanje i potvrđivanje konačnog Centralnog biračkog spiska te rokovi za dostavljanje podataka o promjenama u evidencijama raseljenih lica i evidenciji državljana koji glasaju izvan Bosne i Hercegovine (član 3.6 stav (7) Izbornog zakona BiH);
- b) način, odgovornost za rad, rok za uspostavljanje i druga bitna pitanja za rad Centra za birački spisak (član 3.8 stav (5) Izbornog zakona BiH);
- c) sadržaj i forma obrasca zahtjeva za određivanje ili promjenu biračke opcije (član 3.9 stav (5) Izbornog zakona BiH);
- d) sadržaj i forma izvoda iz Centralnog biračkog spiska koji se koristi za provođenje izbora (član 3.7 Izbornog zakona BiH);
- e) postupak i način slanja, primanja, obrade, arhiviranja i zaštite elektronskih prijava i dokumenata (član 3.15 stav (10) Izbornog zakona BiH) i
- f) forma obrasca prijave za glasanje, način podnošenja prijave, postupak kojim se provjerava tačnost dostavljenih podataka te uputstva vezana za postupak upisa birača u izvod iz Centralnog biračkog spiska za glasanje izvan Bosne i Hercegovine (u daljem tekstu: izvan BiH) iz člana 3.15 stavovi (1), (4), (7) i (14) Izbornog zakona BiH.

Član 2.
(Pojmovi)

Pojedini izrazi korišteni u ovom Pravilniku znače:

- a) "Privremeni birački spisak" podrazumijeva izvod iz evidencije Centralnog biračkog spiska koji se koristi u svrhu omogućavanja uvida javnosti u podatke iz Centralnog biračkog spiska.
- b) "Konačni birački spisak" podrazumijeva evidenciju o biračima koji imaju biračko pravo za izbore u Bosni i Hercegovini.
- c) "Izvod iz zaključenog konačnog Centralnog biračkog spiska" sadrži podatke iz Centralnog biračkog spiska za provođenje izbora u Bosni i Hercegovini.
- d) "Izvod iz Centralnog biračkog spiska za glasanje izvan BiH" sadrži podatke o licima državljanima Bosne i Hercegovine koja su registrirana da glasaju izvan BiH.
- e) "Kombinacija" je set svih glasačkih listića za sve nivoe vlasti za koje se provode izbori, koje birač na biračkom mjestu preuzme od člana biračkog odbora koji izdaje glasačke listiće.
- f) "Ovlašteni predstavnik političkog subjekta" podrazumijeva lice ovlašteno za zastupanje političke stranke koje je upisano u sudski registar, nezavisnog kandidata, lice ovlašteno od

svih predsjednika političkih stranaka članica koalicije i lice ovlašteno od svih nezavisnih kandidata članova liste nezavisnih kandidata.

POGLAVLJE II. ROKOVI ZA DOSTAVLJANJE I ZAKLJUČIVANJE CENTRALNOG BIRAČKOG SPISKA

Član 3.

(Rokovi za zaključivanje i potvrđivanje konačnog Centralnog biračkog spiska – član 3.6 stav (7) tačka a) Izbornog zakona BiH)

(1) Centralna izborna komisija Bosne i Hercegovine (u daljem tekstu Centralna izborna komisija BiH) zaključuje i potvrđuje Centralni birački spisak sa stanjem na sljedeće dane:

- a) dan prije raspisivanja izbora sa stanjem u 24.00 sata;
- b) za birače koji glasaju izvan BiH, 75 dana prije dana održavanja izbora u 24.00 sata;
- c) za birače koji glasaju na redovnom biračkom mjestu, 45 dana prije dana održavanja izbora u 24.00 sata i
- d) na dan održavanja izbora u 24.00 sata.

(2) Sve promjene koje nastanu nakon roka utvrđenog u stavu (1) ovog člana neće biti sadržane u zaključenom i potvrđenom Centralnom biračkom spisku.

(3) Odluka o zaključivanju i potvrđivanju Centralnog biračkog spiska sadrži datum i ukupan broj upisanih birača po izbornim jedinicama, a objavljuje se u službenim glasilima. Sastavni dio ove odluke je Centralni birački spisak u elektronskom obliku, utvrđen ovom odlukom, koji će biti korišten za izbore, a koji neće biti objavljivan u službenim glasilima.

(4) Odluku o zaključivanju Centralnog biračkog spiska za birače koji glasaju putem mobilnog tima Centralna izborna komisija BiH utvrdit će posebnom odlukom.

Član 4.

(Rokovi i način za dostavljanje podataka o promjenama u evidencijama raseljenih lica i evidenciji državljana koji glasaju izvan BiH – član 3.6 stavovi (2) tačke b) i c) i (7) tačka b) Izbornog zakona BiH)

(1) Ministarstvo za ljudska prava i izbjeglice Bosne i Hercegovine dostavlja podatke o promjenama u evidencijama raseljenih lica, uključujući i ispravke nepotpunih podataka (slovne greške u imenu ili prezimenu, greške u broju kod JMB-a i slično), u elektronskoj formi i odštampane, dva puta u neizbornoj godini, a u izbornoj do 31. marta.

(2) Ministarstvo za ljudska prava i izbjeglice Bosne i Hercegovine dostavlja listu lica koja su izgubila status raseljenog lica.

(3) Raseljeno lice iz stava (1) ovog člana ima pravo odrediti ili promijeniti svoju biračku opciju u nadležnom Centru za birački spisak najkasnije 75 dana prije održavanja izbora.

(4) Državljanin Bosne i Hercegovine koji privremeno živi u inostranstvu ili koji ima status izbjeglog lica iz Bosne i Hercegovine prijavu za glasanje izvan BiH podnosi najkasnije 75 dana prije dana održavanja izbora. Ukoliko ne dostavi prijavu u navedenom roku, nalazit će se u izvodu iz Centralnog biračkog spiska na odgovarajućem biračkom mjestu u osnovnoj izbornoj jedinici u kojoj ima prebivalište.

(5) Centralna izborna komisija BiH na pogodan način u izbornom periodu obavještava birače iz stavova (3) i (4) ovog člana o načinu i rokovima upisa, određivanja ili promjeni biračke opcije.

POGLAVLJE III. CENTAR ZA BIRAČKI SPISAK

Član 5.

(Uspostavljanje i rad Centra za birački spisak – član 3.8 stavovi (4) i (5) Izbornog zakona BiH)

(1) U svakoj općini, gradu i u Brčko distriktu Bosne i Hercegovine (u daljem tekstu: Brčko distrikt BiH) nadležni organ uspostavlja Centar za birački spisak.

(2) Nadležni organ iz stava (1) ovoga člana donosi akt o uspostavljanju Centra za birački spisak u kojem utvrđuje: unutrašnju organizaciju i sistematizaciju, način rukovođenja, ovlaštenja, odgovornost za rad Centra za birački spisak i njegovih službenika te ostala pitanja bitna za rad Centra za birački spisak.

(3) Prostorije u kojima se vode i čuvaju matične knjige, kao i druge prostorije dostupne javnosti, mogu služiti kao Centar za birački spisak i kao takve moraju biti vidno označene.

Član 6.

(Oprema – član 3.8 stav (5) Izbornog zakona BiH)

Prostorija u kojoj je smješten Centar za birački spisak mora biti opremljena, pored ostalog, i jednim računarom koji će biti korišten za potrebe Centra za birački spisak, direktnom telefonskom linijom, internet-konekcijom i aplikacijom za vođenje Centralnog biračkog spiska.

Član 7.

(Obuka – član 3.8 stav (2) Izbornog zakona BiH)

(1) Obuku službenika u Centru za birački spisak vrši nadležni općinski organ u saradnji s općinskom/gradskom izbornom komisijom (u daljem tekstu: Izborna komisija).

(2) U slučaju posebnih specijalističkih obuka koje su utvrđene Planom i programom edukacije članova organa za provođenje izbora Centralne izborne komisije BiH, obuku službenika u Centru za birački spisak vrši i Centralna izborna komisija BiH u saradnji s Izbornom komisijom.

Član 8.

(Nadležnosti – član 3.8 stav (3) tačka f) Izbornog zakona BiH)

(1) Službenik u Centru za birački spisak:

- a) pruža tehničku pomoć Izornoj komisiji prilikom određivanja biračkih mjesta na teritoriji općine i raspoređivanja birača po biračkim mjestima;
- b) vodi evidenciju o svim naseljenim mjestima i nazivima svih ulica na teritoriji svoje općine i o svim promjenama obavještava Izbornu komisiju;
- c) ažurira podatke u skladu s promjenom broja birača i propisima Centralne izborne komisije BiH;
- d) osigurava uvid u izvod iz Centralnog biračkog spiska na teritoriji svoje općine;
- e) učestvuje u realizaciji izlaganja izvoda iz privremenog Centralnog biračkog spiska;
- f) osigurava podatke za Centralni birački spisak koji su utvrđeni propisima Centralne izborne komisije BiH;
- g) raseljenom licu izdaje potvrdu o prijemu zahtjeva za promjenu biračke opcije (PBO-1), u skladu s odredbama člana 12. stav (4) ovog Pravilnika;
- h) vrši promjenu biračke opcije raseljenih lica, u skladu s odredbama člana 12. stav (5) ovog Pravilnika, i vodi spis/evidenciju o primljenim i obrađenim zahtjevima;

- i) pruža tehničku pomoć Izornoj komisiji u vezi sa zahtjevima i prigovorima birača koji se odnose na izvod iz Centralnog biračkog spiska;
- j) pruža tehničku pomoć Izornoj komisiji prilikom formiranja mobilnih timova;
- k) pruža tehničku pomoć Izornoj komisiji prilikom imenovanja biračkih odbora (pomoć pri žrijebanju, kod izrade akata o imenovanju, obuke biračkih odbora i sl);
- l) pruža tehničku pomoć Izornoj komisiji prilikom provjere i pripreme biračkih mjesta za izbore;
- m) pruža tehničku pomoć Izornoj komisiji u kampanji obavještavanja birača o svim segmentima u vezi s izbornim procesom;
- n) na dan održavanja izbora, nakon izvršene provjere, izdaje potvrdu državljaninu Bosne i Hercegovine koji ima biračko pravo, a ne nalazi se u zaključenom izvodu iz Centralnog biračkog spiska, i upućuje ga da glasa na biračkom mjestu određenom za glasanje nepotvrđenim kovertiranim glasačkim listićima, a odnosi se na birača koji je nakon zaključenja Centralnog biračkog spiska napunio 18 godina;
- o) po potrebi pruža tehničku pomoć Izornoj komisiji prilikom objedinjavanja izbornih rezultata na nivou osnovne izborne jedinice;
- p) obavlja i druge poslove koje mu odredi Centralna izborna komisija BiH i Izborna komisija, u skladu s propisima Centralne izborne komisije BiH.

(2) Službenik u Centru za birački spisak u neizornoj godini podnosi tromjesečni izvještaj Centralnoj izornoj komisiji BiH, koji sadrži podatke o svim izmjenama izvršenim u Centralnom biračkom spisku za izvještajni period (ime, prezime, JMB, datum i vrsta izmjene koja je izvršena).

Član 9.

(Odgovornost za rad – član 3.8 stav (5) Izbornog zakona BiH)

- (1) Nadležni organ iz člana 5. stav (1) ovog Pravilnika odgovoran je za rad Centra za birački spisak.
- (2) Izborna komisija vrši kontrolu rada Centra za birački spisak.
- (2) Službenik u Centru za birački spisak odgovoran je za vođenje službenih evidencija, ažuriranje i tačnost svih podataka koje vodi i osigurava Centar za birački spisak, kao i za druge poslove iz nadležnosti Centra za birački spisak utvrđene Izbornim zakonom BiH i ovim Pravilnikom.
- (3) Izborna komisija će nakon kontrole, ukoliko utvrdi nepravilnosti, pokrenuti postupak po službenoj dužnosti protiv službenika u Centru za birački spisak koji krši prava birača ili političkog subjekta, u skladu s članom 6.2 stav (2) Izbornog zakona BiH i odredbama ovog Pravilnika.

Član 10.

(Radno vrijeme – član 3.8 stav (5) Izbornog zakona BiH)

- (1) Redovno radno vrijeme Centra za birački spisak jednako je radnom vremenu organa uprave osnovne izborne jedinice.
- (2) Ako se u određenom periodu poveća obim posla, nadležni organ iz člana 5. stav (1) ovog Pravilnika samostalno ili na prijedlog Izborne komisije može naložiti da Centar za birački spisak radi i duže od redovnog radnog vremena, kao i da radi u neradne dane, u smjenama i s više izvršilaca.
- (3) Centar za birački spisak obavezan je na pogodan način obavijestiti birače o radnom vremenu Centra za birački spisak.
- (4) U izornoj godini službenik u Centru za birački spisak ima pravo na mjesečnu naknadu za svoj rad zbog povećanog obima posla (rad i duže od redovnog radnog vremena i rad u neradne dane), kako je to propisano u stavu (2) ovog člana.

(5) Visinu naknade iz stava (4) ovog člana utvrđuje nadležni organ u saradnji s izbornom komisijom osnovne izborne jedinice.

POGLAVLJE IV. BIRAČKA OPCIJA

Član 11.

(Način i rok za podnošenje zahtjeva za promjenu biračke opcije PBO-1 – član 3.9 stav (5) Izbornog zakona BiH)

(1) Zahtjev za promjenu biračke opcije raseljeno lice podnosi lično nadležnom Centru za birački spisak na obrascu PBO-1, koji je sastavni dio ovog Pravilnika.

(2) U periodu održavanja redovnih izbora za organe vlasti u Bosni i Hercegovini zahtjev se podnosi najkasnije 75 dana prije održavanja izbora, u skladu s odredbama člana 4. stav (3) ovog Pravilnika, kako bi promjene biračke opcije bile ažurirane.

Član 12.

(Način prijema zahtjeva i rokovi – član 3.9 stav (5) Izbornog zakona BiH)

(1) Uz popunjen i potpisan obrazac PBO-1 raseljeno lice dužno je, u cilju identifikacije, službeniku u Centru za birački spisak predočiti jedan od važećih ličnih dokumenata iz člana 5.12 stav (5) Izbornog zakona BiH, odnosno ličnu kartu, pasoš ili vozačku dozvolu. Ukoliko je birač promijenio ime, obavezan je, uz jedan od navedenih ličnih dokumenata, dati na uvid i rješenje o promjeni imena izdato od nadležnog organa.

(2) Nakon što utvrdi identitet podnosioca zahtjeva iz stava (1) ovog člana, službenik u Centru za birački spisak vrši provjeru podataka koji se vode u službenim evidencijama o prebivalištu podnosioca zahtjeva prema popisu iz 1991. godine.

(3) Po provedenim radnjama iz stavova (1) i (2) ovog člana, službenik u Centru za birački spisak svojim potpisom potvrđuje autentičnost unesenih podataka, a kopiju važećeg ličnog dokumenta, zajedno s podnesenim zahtjevom, prilaže u spis predmeta koji čuva u svojoj arhivi.

(4) Službenik u Centru za birački spisak licu koje je podnijelo zahtjev za promjenu biračke opcije kao potvrdu o prijemu zahtjeva izdaje kopiju podnesenog zahtjeva, odnosno PBO-1 obrasca.

(5) Centri za birački spisak primaju i obrađuju zahtjeve zaprimljene od raseljenog lica u roku utvrđenom u članu 4. stav (3) ovog Pravilnika, a koji se vode u elektronskoj formi radi ažuriranja izvoda iz Centralnog biračkog spiska za raseljena lica.

POGLAVLJE V. IZVODI IZ CENTRALNOG BIRAČKOG SPISKA

Član 13.

(Izvodi iz Centralnog biračkog spiska – član 3.7 Izbornog zakona BiH)

(1) Na osnovu elektronske evidencije Centralnog biračkog spiska, koja je sastavni dio odluke iz člana 3. stav (3) ovog Pravilnika, Centralna izborna komisija BiH izrađuje:

- a) izvode iz konačnog Centralnog biračkog spiska za birače koji glasaju na redovnom biračkom mjestu,
- b) izvode iz konačnog Centralnog biračkog spiska za birače koji glasaju putem pošte,
- c) izvode iz konačnog Centralnog biračkog spiska za birače koji glasaju u diplomatsko-konzularnom predstavništvu Bosne i Hercegovine (u daljem tekstu: DKP BiH),
- d) izvode iz konačnog Centralnog biračkog spiska za birače koji glasaju u odsustvu i

- e) spisak birača koji su upisani da glasaju izvan BiH (putem pošte i u DKP-u BiH) i koji imaju pravo glasati nepotvrđenim kovertiranim glasačkim listićima, ukoliko se na dan održavanja izbora zateknu u zemlji.

(2) Na osnovu podataka koje dostavi Izborna komisija i odluke iz člana 3. stav (4) ovog Pravilnika, Centralna izborna komisija BiH izrađuje:

- a) izvod iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta i
- b) izvod iz konačnog Centralnog biračkog spiska za birače koji su zatvorenici ili su vezani za ustanove, a imaju biračko pravo.

(3) Centralna izborna komisija BiH na zahtjev organa lokalne samouprave izrađuje i dostavlja odgovarajući izvod iz Centralnog biračkog spiska za potrebe organizacije i provođenja referenduma, opoziva izabranog zvaničnika i izbora organa lokalne samouprave.

(4) Za Opće izbore 2026. godine na biračkim mjestima na kojima se provode specifične izborne tehnologije, Izvod iz Centralnog biračkog spiska dostavlja se u elektronskom obliku, kako bi izborne komisije osnovne izborne jedinice isti mogle štampati ukoliko se ukaže potreba za tim. Podaci u izvodu iz Centralnog biračkog spiska štampaju se na jezicima i pismima koji su u službenoj upotrebi u Bosni i Hercegovini.

(5) U izvodu iz konačnog Centralnog biračkog spiska označen je datum njegovog zaključivanja i napomena da promjene izvršene poslije tog datuma nisu uzete u obzir.

Član 14.

(Sadržaj izvoda iz Centralnog biračkog spiska – član 3.10 stav (3) Izbornog zakona BiH)

(1) Izvod iz konačnog Centralnog biračkog spiska za birače koji glasaju na redovnom biračkom mjestu sadrži sljedeće podatke:

- a) kod i naziv osnovne izborne jedinice,
- b) broj i naziv biračkog mjesta,
- c) prezime, ime jednog roditelja i ime birača,
- d) spol,
- e) JMB i JMB u obliku bar-koda,
- f) rubriku za potpis glasača.

(2) Izvod iz Centralnog biračkog spiska za raseljena lica koja glasaju u odsustvu sadrži sljedeće podatke:

- a) kod i naziv osnovne izborne jedinice u kojoj birač glasa,
- b) broj i naziv biračkog mjesta,
- c) naziv i oznaku kombinacije osnovne izborne jedinice za koju birač glasa,
- d) prezime, ime jednog roditelja i ime birača,
- e) spol,
- f) JMB i JMB u obliku bar-koda,
- g) rubriku za potpis birača, koja sadrži oznaku kombinacije.

(3) Izvod iz konačnog Centralnog biračkog spiska za birače koji glasaju nepotvrđenim kovertiranim glasačkim listićima identičan je izvodu iz stava (1) ovog člana, s tim što podatke o biračima koji glasaju upisuje član biračkog odbora zadužen za identifikaciju.

(4) Izvod iz Centralnog biračkog spiska iz stava (1) ovog člana za birače koji glasaju u Brčko distriktu BiH, kada se provode izbori navedeni u članu 18.2 alineje 1) i 2) Izbornog zakona BiH, sastoji se iz dva dijela:

- a) dio A – birači koji imaju entitetsko državljanstvo Federacije Bosne i Hercegovine i
- b) dio B – birači koji imaju entitetsko državljanstvo Republike Srpske.

(5) Izvod iz Centralnog biračkog spiska za birače koji glasaju putem mobilnog tima identičan je izvodu iz stava (1) ovog člana, s tim što je upisan i naziv osnovne izborne jedinice za koju birač glasa, kao i oznaka kombinacije.

Član 15.

(Izlaganje izvoda iz Centralnog biračkog spiska u neizbornoj godini – član 3.2 stav (2) Izbornog zakona BiH)

(1) U neizbornoj godini se izvodi iz Centralnog biračkog spiska izlažu na uvid javnosti dva puta, i to prvi put najkasnije do kraja juna, a drugi put najkasnije do kraja decembra kalendarske godine.

(2) Izvodi iz Centralnog biračkog spiska dostavljaju se Izbornim komisijama i Centrima za birački spisak, a sadrže osnovne podatke birača: ime (ime roditelja) prezime, latiničnim i ćiriličnim pismom, spol, šifra adrese i datum rođenja.

(3) Izvod iz Centralnog biračkog spiska izrađuje se na obrascu IPCBS, koji je sastavni dio Pravilnika o upotrebi i izradi Centralnog biračkog spiska, bez podataka o jedinstvenom matičnom broju i adresi birača.

(4) Izborne komisije osnovne izborne jedinice u Bosni i Hercegovini dužne su izložiti izvode iz Centralnog biračkog spiska kako bi državljani s biračkim pravom imali pristup istim i mogli provjeriti i izvršiti ispravku ili dopunu svojih podataka kod nadležnog organa.

(5) Izborne komisije dužne su na pogodan način obavijestiti birače da se izvod iz Centralnog biračkog spiska nalazi u Centru za birački spisak, kako bi mogli provjeriti i po potrebi izvršiti ispravku ili dopunu svojih podataka ili provjeriti biračku opciju.

(6) Izborne komisije dužne su obavijestiti Centralnu izbornu komisiju BiH o načinu obavještanja javnosti.

(7) Podaci u Centralnom biračkom spisku u neizbornoj godini redovno se ažuriraju.

(8) Podatke iz stava (7) ovog člana birač može provjeriti na veb-stranici Centralne izborne komisije BiH, putem veb-servisa “Da li ste registrirani” koji se ažurira jednom mjesečno.

Član 16.

(Privremeni birački spisak u izbornoj godini – član 3.11 Izbornog zakona BiH)

(1) Centralna izborna komisija BiH sačinjava Privremeni birački spisak, sa stanjem na dan raspisivanja izbora, koji se dostavlja Izornoj komisiji i Centru za birački spisak.

(2) Privremeni birački spisak izrađuje se na obrascu koji je sastavni dio ovog Pravilnika, u elektronskoj verziji, po osnovnim izbornim jedinicama i biračkim mjestima te ne sadrži podatke o jedinstvenom matičnom broju i adresi birača

(3) Uz Privremeni birački spisak Centralna izborna komisija BiH dostavlja Izbornim komisijama i obrazac zahtjeva za promjenu biračke opcije (PBO-1), kako bi raseljeno lice imalo mogućnost odabrati biračku opciju određenu članom 20.8 Izbornog zakona BiH.

(4) Podatke iz stava (1) ovog člana birač može provjeriti na veb-stranici Centralne izborne komisije BiH, putem veb-servisa “Da li ste registrirani”.

Član 17.

(Izlaganje Privremenog biračkog spiska – član 3.1 stav (5) Izbornog zakona BiH)

- (1) Izborne komisije izlažu Privremeni birački spisak na uvid javnosti u periodu od 120 do 90 dana prije dana održavanja izbora s ciljem osiguravanja tačnosti, ažurnosti i ukupnog integriteta konačnog izvoda iz Centralnog biračkog spiska.
- (2) Izborne komisije dužne su izložiti Privremeni birački spisak na uvid javnosti, kako bi državljani Bosne i Hercegovine s biračkim pravom mogli provjeriti svoje podatke i izvršiti ispravku ili dopunu svojih podataka kod nadležnog organa.
- (3) Izborne komisije dužne su na pogodan način obavijestiti birače da se Privremeni birački spisak nalazi u Centru za birački spisak, mjesnim zajednicama i drugim pogodnim mjestima utvrđenim planom izlaganja Privremenog biračkog spiska, kako bi mogli provjeriti i izvršiti ispravku ili dopunu svojih podataka kod nadležnog organa i opredijeliti se za biračku opciju (općina, odnosno mjesto glasanja i način glasanja – lično ili u odsustvu).

Član 18.

(Plan izlaganja Privremenog biračkog spiska – članovi 2.13 i 3.11 Izbornog zakona BiH)

- (1) Izborne komisije donose plan izlaganja Privremenog biračkog spiska u periodu od 150 do 125 dana prije dana održavanja izbora.
- (2) Plan izlaganja obuhvata način obavješćavanja javnosti o trajanju izlaganja ovog izvoda, informaciju o mjestima na kojima će izvodi biti izloženi, način obavješćavanja raseljenih lica o eventualnoj promjeni biračke opcije u Centru za birački spisak, kao i ostale bitne informacije vezane za način i vrijeme izlaganja izvoda.
- (3) Izborna komisija dostavlja Centralnoj izbornoj komisiji BiH plan izlaganja Privremenog biračkog spiska najkasnije 125 dana prije dana održavanja izbora i isti objavljuje na internet-stranici, oglasnoj ploči općine/grada ili na drugi prigodan način.
- (4) Ukoliko Centralna izborna komisija BiH ustanovi da planom izlaganja Privremenog biračkog spiska nije utvrđen primjeren način obavješćavanja javnosti i raseljenih lica, naložit će Izbornoj komisiji poduzimanje dodatnih mjera i aktivnosti.

Član 19.

(Izvod iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta – član 3.14 stav (1) tačka a) Izbornog zakona BiH)

- (1) Izvodi iz konačnog Centralnog biračkog spiska za birače koji su vezani za svoje domove zbog starosti, bolesti ili invaliditeta sačinjavaju se na osnovu podataka nadležnog organa zaduženog za socijalno staranje i drugih organa koji imaju podatke o ovim licima te izražene volje ovih birača da na dan izbora glasaju u svojim domovima, što se utvrđuje pisanom izjavom svakog birača i pratećom medicinskom dokumentacijom o bolesti ili invaliditetu birača kao uvjetu za njegovo kućno liječenje.
- (2) Izborna komisija najkasnije u roku od 40 dana prije dana održavanja izbora pisanim putem zahtijeva od nadležnih organa podatke o svim licima koja su zbog starosti, bolesti ili invaliditeta vezana za svoje domove.
- (3) Nadležni organ iz stava (2) ovog člana podatke po zahtjevu Izborne komisije dostavlja u roku od 7 dana od dana prijema zahtjeva, radi evidentiranja birača koji su zbog starosti, bolesti ili invaliditeta vezani za svoje domove.

(4) Na osnovu podataka iz stava (3) ovog člana Izborna komisija, u saradnji s Centrom za birački spisak, sačinjava plan obilaska birača iz stava (1) ovog člana radi prijedloga upisa u izvod iz Centralnog biračkog spiska za glasanje putem mobilnog tima.

(5) Izborna komisija nakon provedenog postupka iz stava (4) ovog člana sačinjava spisak birača koji su vezani za svoje domove zbog starosti, bolesti ili invaliditeta i dostavlja ga Centralnoj izbornoj komisiji BiH u odgovarajućem elektronskom obliku, unosom podataka u aplikaciju, kao i kopiju dokumentacije iz stava (1) ovog člana, i to 20 dana prije dana održavanja izbora, radi izrade izvoda iz konačnog Centralnog biračkog spiska.

(6) Nakon razmatranja dokumentacije iz stava (1) ovog člana, Centralna izborna komisija BiH utvrđuje i sačinjava izvod iz konačnog Centralnog biračkog spiska za ovu kategoriju birača i isti dostavlja Izbornoj komisiji u roku od 10 dana, a najkasnije pet dana prije dana održavanja izbora.

(7) Izborna komisija na osnovu dobijenog izvoda iz konačnog Centralnog biračkog spiska za glasanje putem mobilnog tima iz stava (6) ovog člana, u izvodu u kojem je birač upisan za glasanje na redovnom biračkom mjestu, pored imena birača u koloni “potpis” upisuje oznaku MOBILNI TIM.

Član 20.

(Izvod iz konačnog Centralnog biračkog spiska za birače koji su zatvorenici ili su vezani za ustanove, a imaju pravo glasati – član 3.14 stav (1) tačka b) Izbornog zakona BiH)

(1) Izvod iz konačnog Centralnog biračkog spiska za lica koja su zatvorenici ili su vezana za ustanove (kazneno-popravni domovi, pritvorske jedinice, gerijatrijske, distrofičarske ili druge zdravstvene ustanove) i imaju pravo glasa sačinjava se na osnovu podataka dobijenih od ustanova u kojima su ova lica smještena.

(2) Izborna komisija najkasnije u roku od 40 dana prije dana održavanja izbora za lica iz stava (1) ovog člana pisanim putem zahtijeva od nadležnog organa podatke o svim licima koja su vezana za ustanove na području njihove osnovne izborne jedinice.

(3) Organ iz stava (2) ovog člana najkasnije u roku od sedam dana od dana prijema zahtjeva Izbornoj komisiji dostavlja podatke o licima iz stava (1) ovog člana, koji uključuju: ime, prezime, datum rođenja, JMBG, punu adresu prebivališta, odnosno boravišta za raseljena lica, kao i podatak hoće li se ta lica nalaziti u ustanovi na dan održavanja izbora.

(4) Na osnovu podataka iz stava (3) ovog člana Izborna komisija, u saradnji s Centrom za birački spisak, sačinjava plan obilaska ustanova radi upisa birača u izvod iz Centralnog biračkog spiska za glasanje putem mobilnog tima.

(5) Centralna izborna komisija BiH na osnovu podataka iz stava (3) ovog člana sačinjava izvod iz konačnog Centralnog biračkog spiska za birače iz stava (1) ovog člana i dostavlja ga Izbornoj komisiji u roku od 10 dana, a najkasnije pet dana prije dana održavanja izbora.

(6) Izborna komisija na osnovu dobijenog izvoda iz konačnog Centralnog biračkog spiska za glasanje putem mobilnog tima, u izvodu u kojem je birač upisan za glasanje na redovnom biračkom mjestu, pored imena birača u koloni “potpis” upisuje oznaku MOBILNI TIM – USTANOVA.

(7) Ukoliko lice smješteno u ustanovi iz stava (1) ovog člana nema prebivalište u osnovnoj izbornoj jedinici u kojoj se nalazi ustanova, a na dan održavanja izbora nalaziti će se u ustanovi, Izborna komisija će odmah, a najkasnije u roku od dva dana po dobijanju izvoda iz konačnog Centralnog biračkog spiska iz stava (5) ovog člana, nadležnoj Izbornoj komisiji po mjestu prebivališta lica smještenog u ustanovi dostaviti podatak o tome, kako bi ista u rubrici potpis za navedenog birača upisala MOBILNI TIM – USTANOVA.

Član 21.

(Izvodi iz Centralnog biračkog spiska za političke subjekte – član 3.1 stav (6) Izbornog zakona BiH)

(1) Ovlašteni predstavnik političkog subjekta koji ima ovjerenu kandidatsku listu za učešće na izborima može 45 dana prije dana održavanja izbora podnijeti pisani zahtjev Centralnoj izbornoj komisiji BiH za dostavljanje izvoda iz Centralnog biračkog spiska za izbornu jedinicu u kojoj učestvuje na izborima.

(2) Izvodi iz stava (1) ovog člana izrađuju se prema osnovnoj izbornoj jedinici u kojoj se glasa i sadrže sljedeće podatke:

- a) kod i naziv osnovne izborne jedinice,
- b) naziv i broj biračkog mjesta,
- c) prezime, ime jednog roditelja i ime birača,
- d) spol,
- e) datum rođenja,
- f) mjesto rođenja.

(3) Izvode iz ovog člana Centralna izborna komisija BiH dostavlja u elektronskoj formi.

Član 22.

(Izvodi iz Centralnog biračkog spiska za provođenje opoziva zvaničnika i izbore organa lokalne samouprave – član 3.1 stav (1) Izbornog zakona BiH)

(1) Izvodi iz Centralnog biračkog spiska, utvrđeni u članu 13. stav (3) ovog Pravilnika, sadrže sljedeće podatke:

- a) kod i naziv osnovne izborne jedinice,
- b) naziv i broj biračkog mjesta,
- c) prezime, ime jednog roditelja i ime birača,
- d) spol,
- e) JMB i JMB u obliku bar-koda,
- f) rubriku za potpis birača.

(2) Izvodi iz Centralnog biračkog spiska za izbor organa lokalne samouprave izrađuju se pojedinačno prema naseljenom mjestu (ulici), koji čine odgovarajući organ lokalne samouprave i sadrže, pored podataka iz stava (1) ovog člana, i podatak o nazivu naseljenog mjesta (mjesne zajednice).

(3) Izvode iz stava (1) ovog člana izrađuje Centralna izborna komisija BiH po zahtjevu nadležnog organa.

(4) Zahtjev iz stava (3) ovog člana nadležni organ dostavlja najkasnije 30 dana prije dana održavanja izbora i uz njega je dužan priložiti odluku o raspisivanja izbora koja obavezno sadrži datum održavanja navedenih izbora, objavljenu u službenim glasilima, i akt o određivanju mjesnih zajednica na području općine/grada za koje se provode izbori.

(5) Izvode iz ovog člana Centralna izborna komisija BiH dostavlja u elektronskom obliku i njihovo štampanje vrši nadležni organ za provođenje izbora.

Član 23.

(Posebna oznaka u zaključenom izvodu iz Centralnog biračkog spiska)

Centralna izborna komisija BiH za sve birače za koje Centar za birački spisak, u saradnji s nadležnim matičnim uredom, utvrdi da se njihova imena nalaze na zaključenom izvodu iz Centralnog biračkog spiska, a provjerama je utvrđeno da se radi o umrlom licu za koje je nadležni

matični ured izdao izvod iz matične knjige umrlih, u rubrici za potpis glasača iz člana 14. stav (1) tačka f) ovog Pravilnika stavlja oznaku “*”.

POGLAVLJE VI. PRIJAVA BIRAČA ZA GLASANJE IZVAN BIH UPISANIH U CENTRALNI BIRAČKI SPISAK

Član 24.

(Način podnošenja prijave izbjeglih lica i lica na privremenom boravku u inostranstvu upisanih u Centralni birački spisak – član 3.15 Izbornog zakona BiH)

(1) Državljanin Bosne i Hercegovine koji ima privremeni boravak ili status izbjeglog lica, koji je upisan u Centralni birački spisak, da bi se nalazio na izvodu iz Centralnog biračkog spiska za glasanje izvan BiH dužan je podnijeti elektronsku prijavu za svake izbore kojom se opredjeljuje za glasanje u DKP-u BiH ili putem pošte, na način utvrđen u članu 3.15 stav (10) Izbornog zakona BiH.

(2) Način podnošenja prijave elektronskim putem vrši se u skladu s Uputstvom o postupku slanja, prijema, obrade, arhiviranja i zaštite elektronskih prijava državljana Bosne i Hercegovine za glasanje izvan BiH elektronskim putem (u daljem tekstu: Uputstvo).

(3) Ukoliko prijava ne bude podnesena na način utvrđen u članu 3.15 stav (10) Izbornog zakona BiH, Centralna izborna komisija BiH pismeno, faksom ili telefonom određuje podnosiocu prijave rok za otklanjanje utvrđenih nedostataka.

(4) Podnosilac prijave koji ne postupi na način propisan stavom (3) ovog člana ostat će upisan u Centralni birački spisak za glasanje u Bosni i Hercegovini.

Član 25.

(Izgled i sadržaj Obrasca za prijavu PRP – član 3.15 stav (13) Izbornog zakona BiH)

(1) Izgled i sadržaj Obrasca prijave za državljane Bosne i Hercegovine – PRP, kojim se prijavljuju za glasanje putem pošte ili DKP-a BiH, sastavni je dio ovog Pravilnika.

(2) Popunjavanje Obrasca iz stava (1) ovog člana vrši se elektronski, putem *online* portala.

(3) Centralna izborna komisija BiH omogućit će pristup *online* portalu državljanima Bosne i Hercegovine u skladu s rokovima utvrđenim ovim Pravilnikom.

Član 26.

(Popunjavanje, potpisivanje i prilaganje obrasca prijave i dokumentacija)

(1) Obrazac elektronske prijave za glasanje izvan BiH mora u cijelosti popuniti podnosilac prijave, a e-adresu može koristiti samo jednom i za jednu prijavu.

(2) Nakon popunjavanja obrasca elektronske prijave, podnosilac isti štampa i potpisuje identično potpisu na identifikacionom dokumentu koji prilaže uz prijavu.

(3) Uz fotografiran, skeniran ili u drugom elektronskom formatu snimljen obrazac prijave, koji je svojeručno potpisan, podnosilac prijave putem *online* portala prilaže fotografirane, skenirane ili u drugom pogodnom elektronskom formatu snimljene sljedeće dokumente:

a) obrazac elektronske prijave s potpisom,

b) dokaz o identitetu i

c) dokaz o tačnoj adresi u inostranstvu za birače koji glasaju putem pošte, izdat od nadležnog organa, ili važeći lični dokument izdat od zemlje domaćina koji sadrži tačnu adresu boravišta u inostranstvu.

(4) Dokaz o identitetu izbjeglog lica, u smislu člana 3.15 Izbornog zakona BiH, smatra se elektronski priložen i važeći jedan od sljedećih dokumenata:

- a) fotografirana, skenirana ili u drugom elektronskom formatu kopirana bosanskohercegovačka lična karta – obje strane ili
- b) fotografiran, skeniran ili u drugom elektronskom formatu kopiran bosanskohercegovački pasoš – dio s podacima i fotografijom.

(5) Izbjeglo lice, pored dokaza o identitetu iz stava (4) ovog člana, može priložiti važeći fotografiran, skeniran ili u drugom elektronskom formatu snimljen dokument s fotografijom, izdat od zemlje domaćina, ili izbjeglički karton, izdat od zemlje domaćina ili druge međunarodne organizacije. Ako izbjeglo lice mijenja biračku opciju pod kojom je upisano u Centralni birački spisak, u skladu s članom 20.8 Izbornog zakona BiH, podnosi i dokaz o promjeni prebivališta u Bosni i Hercegovini.

(6) Birač u obrascu prijave za glasanje izvan BiH obavezan je izjasniti se o načinu glasanja, da li će glasati putem pošte ili u DKP-u BiH, uključujući i mjesto DKP-a BiH u inostranstvu. Ukoliko se birač ne izjasni o načinu glasanja u smislu ovog stava, omogućit će mu se glasanje putem pošte.

(7) Birač iz Brčko distrikta BiH koji nema određenu entitetsku opciju za glasanje, a da bi ostvario svoje biračko pravo, obavezan je u obrascu prijave za glasanje izvan BiH navesti entitetsku biračku opciju za Opće izbore. Ukoliko birač u smislu ovog stava ne navede entitetsku opciju, neće biti upisan u izvod iz Centralnog biračkog spiska za glasanje na Općim izborima i za te izbore neće moći ostvariti svoje biračko pravo za glasanje izvan BiH.

Član 27.

(Obrada prijave – član 3.15 stav (10) Izbornog zakona BiH)

(1) Nakon prijema prijave, Centralna izborna komisija BiH obrađuje prijavu kroz elektronsku aplikaciju za birače koji glasaju izvan BiH (*online* portal).

(2) U slučaju da prijava ne sadrži sve dokaze utvrđene u članu 3.15 stavovi (7) i (8) Izbornog zakona BiH, obrazac prijave je nepotpun ili nije ispravno popunjen, Centralna izborna komisija BiH obavještava podnosioca prijave da je dužan u roku od sedam dana od dana dostavljanja obavijesti Centralne izborne komisije BiH otkloniti uočene nedostatke.

(3) Otklanjanje nedostataka, nepravilnosti ili dopunjavanje prijave i elektronske dokumentacije podnositelj prijave može izvršiti isključivo putem *online* portala.

Član 28.

(Odbijanje prijave – član 3.15 Izbornog zakona BiH)

(1) Ukoliko podnositelj prijave ne otkloni nedostatak ili nepravilnost u prijavi na način utvrđen stavovima (2) i (3) člana 27. ovog Pravilnika, Centralna izborna komisija BiH donosi odluku o odbijanju upisa tog birača u izvod iz Centralnog biračkog spiska za glasanje izvan BiH.

(2) Za podnesene prijave za koje se provjerom utvrdi da ne ispunjavaju propisane uvjete, odnosno prijave čija vjerodostojnost nije utvrđena, Centralna izborna komisija BiH donosi odluku o odbijanju prijave.

Član 29.

(Obavještavanje i zaštita podataka)

(1) Centralna izborna komisija BiH o svim statusnim promjenama, nedostacima i odlukom o podnesenoj prijavi obavještava podnosioca prijave putem *online* portala i e-adrese navedene u prijavi.

(2) Podaci koji su dostavljeni u postupku prijave za upis birača za glasanje izvan BiH obrađuju se u skladu sa Zakonom o zaštiti ličnih podataka, vodeći računa o principima zaštite ličnih podataka.

(3) Centralna izborna komisija BiH po zahtjevu podnosioca prijave uklanja sve podatke koji se nalaze na *online* portalu.

Član 30.

(Nefunkcionalnost i nedostupnost *online* portala)

(1) U slučaju nepredviđenih okolnosti zbog kojih *online* portal nije u funkciji ili je nedostupan, Centralna izborna komisija BiH može koristiti drugi način elektronskog podnošenja prijave i dokumentacije za upis birača za glasanje izvan BiH.

(2) O načinu promjene elektronskog upisa birača za glasanje izvan BiH Centralna izborna komisija BiH obavještava državljane Bosne i Hercegovine koji borave izvan BiH putem zvanične internet-stranice, DKP-a BiH ili na drugi pogodan način.

POGLAVLJE VII. PRIJAVA ZA UPIS IZBJEGLIH LICA ZA GLASANJE IZVAN BiH KOJA NISU UPISANA U CENTRALNI BIRAČKI SPISAK, SADRŽAJ OBRASCA PRIJAVE I OBRADA PRIJAVE

Član 31.

(Prijava i upis izbjeglog lica koje nije upisano u Centralni birački spisak)

(1) Podnošenje prijave za upis izbjeglih lica u Centralni birački spisak kontinuiran je proces, dok se prijava za glasanje vrši u skladu s rokovima koje utvrdi Centralna izborna komisija BiH za tekuće izbore.

(2) Da bi izbjeglo lice koje nije upisano u Centralni birački spisak bilo upisano za glasanje izvan BiH, dužno je podnijeti elektronsku prijavu za upis u Centralni birački spisak za glasanje izvan BiH na način utvrđen u članu 24. ovog Pravilnika.

(3) Uz svojeručno potpisanu elektronsku prijavu zahtjeva za upis u Centralni birački spisak, izbjeglo lice obavezno prilaže sljedeće dokaze:

a) dokaz o identitetu utvrđen stavovima (4) ili (5) člana 26. ovog Pravilnika,

b) dokaz o državljanstvu, kopija bosanskohercegovačkog pasoša (strana s fotografijom i podacima) ili uvjerenje o državljanstvu (izdato od nadležnog organa, ne starije od šest mjeseci),

c) dokaz o prebivalištu, kopija lične karte izdata prije 1991. godine ili dokaz da se nalazi na popisu stanovništva Bosne i Hercegovine iz 1991. godine.

d) dokaz o tačnoj adresi boravišta u inostranstvu, utvrđen u stavu (3) tačka c) člana 26. ovog Pravilnika.

Član 32.

(Izgled i sadržaj obrasca zahtjeva prijave za upis izbjeglog lica u Centralni birački spisak ZPU – član 3.15 stav (7) Izbornog zakona BiH)

(1) Izgled i sadržaj obrasca zahtjeva prijave za izbjegla lica koja se upisuju u Centralni birački spisak za glasanje izvan BiH – ZPU sastavni je dio ovog Pravilnika.

(2) Centralna izborna komisija BiH omogućava popunjavanje putem *online* portala ili preuzimanje obrasca prijave ZPU iz stava (1) ovog člana putem internet-stranice Centralne izborne komisije BiH i internet-stranica državnih organa i drugih institucija koje se bave izbjeglicama i pitanjima migracije.

Član 33.
(Obrada prijave zahtjeva ZPU – član 3.15 Izbornog zakona BiH)

(1) Centralna izborna komisija BiH obrađuje prijavu zahtjeva za upis u Centralni birački spisak na način utvrđen Uputstvom te, ukoliko su ispunjeni uvjeti iz člana 31. ovog Pravilnika, donosi odluku o upisu izbjeglog lica u Centralni birački spisak za glasanje izvan BiH.

(2) U slučaju da prijava ne sadrži sve dokaze utvrđene u članu 3.15 stav (3) Izbornog zakona BiH ili je obrazac prijave nepotpun ili nije ispravno popunjen, Centralna izborna komisija BiH obavještava podnosioca prijave da u roku od sedam dana od dana dostavljanja obavještenja otkloni uočene nedostatke putem službene internet-stranice Centralne izborne komisije BiH www.izbori.ba ili na kontakt-podatke dostavljene u prijavi ili na drugi propisan način.

(3) Ukoliko podnosilac prijave ne postupi na način propisan u stavu (2) ovog člana, prijava lica za glasanje izvan BiH se odbija, a odluka o odbijanju prijave objavljuje se na službenoj internet-stranici Centralne izborne komisije BiH www.izbori.ba, vodeći računa o principima zaštite ličnih podataka, u skladu sa Zakonom o zaštiti ličnih podataka.

(4) Centralna izborna komisija BiH na zvaničnoj internet-stranici objavljuje izvod iz Centralnog biračkog spiska za glasanje izvan BiH bez objavljivanja ličnih podataka, u skladu sa Zakonom o zaštiti ličnih podataka.

POGLAVLJE VIII. POSEBNE EVIDENCIJE

Član 34.
(Vrste evidencija – članovi 3.2 stav (4) i 3.6 stav (2) tačka d) Izbornog zakona BiH)

(1) Centralna izborna komisija BiH vodi posebne evidencije o licima kojima je po osnovu zakona oduzeto pravo da glasaju, kako slijedi:

- a) licu koje je pravosnažnom odlukom nadležnog organa lišeno potpune poslovne sposobnosti i
- b) licu koje ima smetnje prema članovima 1.6, 1.7. i 1.7a Izbornog zakona BiH.

(2) Evidencije iz stava (1) ovog člana sadrže sljedeće podatke:

- a) prezime,
- b) ime,
- c) ime jednog roditelja,
- d) jedinstveni matični broj,
- e) naziv organa koji je donio akt,
- f) broj akta,
- g) datum akta i
- h) rubriku “Napomena”.

Član 35.
(Način evidentiranja – članovi 3.2 stav (4) i 3.6 stav (2) tačka d) Izbornog zakona BiH)

(1) O licu iz člana 34. stav (1) ovog Pravilnika u rubrici “Napomena” iz člana 3.10 stav (1) tačka i) Izbornog zakona BiH bit će evidentirane činjenice i ono se neće naći na izvodima iz konačnog Centralnog biračkog spiska.

(2) Evidentiranje se vrši na sljedeći način:

- a) za lice iz člana 34. stav (1) tačka a) ovog Pravilnika – PS broj i datum rješenja i
- b) za lice iz člana 34. stav (1) tačka b) ovog Pravilnika – IZ broj i datum akta.

(3) Ukoliko licu evidentiranom u Centralnom biračkom spisku bude vraćeno biračko pravo u skladu sa zakonom, podaci upisani u napomenu se brišu i licu se vraća biračko pravo.

POGLAVLJE IX. ZAVRŠNE ODREDBE

Član 36. (Sastavni dio Pravilnika)

Sastavni dio ovog Pravilnika su:

- a) PBO – jedan obrazac zahtjeva za eventualnu promjenu biračke opcije raseljenog lica;
- b) PRP – obrazac prijave za državljane Bosne i Hercegovine koji se prijavljuju za glasanje izvan BiH;
- c) obrasci izgleda izvoda iz Centralnog biračkog spiska (IPCBS – izvod iz privremenog Centralnog biračkog spiska);
- d) obrasci izgleda konačnog izvoda iz Centralnog biračkog spiska (IKCBSR – izvod iz Centralnog biračkog spiska – za birače koji glasaju na redovnom biračkom mjestu);
- e) IKCBSMT – izvod za birače s posebnim potrebama
- f) CBSN – izvod iz Centralnog biračkog spiska za birače koji glasaju nepotvrđenim glasačkim listićima;
- g) IKCBSO – izvod iz Centralnog biračkog spiska za birače koji glasaju u odsustvu;
- h) IKCBSID – spisak za birače koji glasaju izvan BiH;
- i) IKCBSDKP – izvod iz Centralnog biračkog spiska za birače koji glasaju u DKP-u BiH;
- j) ICBSOF – izvod za provođenje opoziva zvaničnika;
- k) ICBSMZ – izvod za izbore organa lokalne samouprave;
- l) ICBSPS – izvodi za političke subjekte;
- m) Potvrda za glasanje nepotvrđenim kovertiranim glasačkim listićem za birače izvan BiH i
- n) PUCBS – prijava za upis u Centralni birački spisak izbjeglog lica.

Član 37. (Upotreba izraza u muškom i ženskom rodu)

Riječi koje su radi preglednosti u ovom Pravilniku navedene u jednom rodu, bez diskriminacije se odnose i na muški i na ženski rod.

Član 38. (Prestanak primjene)

Danom stupanja na snagu ovog Pravilnika prestaje važiti Pravilnik o upotrebi i izradi izvoda iz Centralnog biračkog spiska (“Službeni glasnik BiH”, br. 31/24 i 35/25).

Član 39. (Stupanje na snagu i objavljivanje)

Ovaj Pravilnik stupa na snagu danom donošenja, a bit će objavljen u “Službenom glasniku BiH”, “Službenim novinama FBiH”, “Službenom glasniku RS”, “Službenom glasniku Brčko distrikta BiH” i na internet-stranici Centralne izborne komisije BiH www.izbori.ba.

Broj: 05-1-02-2-710-1/26
Sarajevo, 06.05.2026. godine

